

大唐開元禮



大唐開元禮



大唐開元禮卷第一百六

嘉禮

臨軒冊命皇太子

卜日

告園丘

告方澤

告太廟

臨軒冊命

謁中宮

謁太廟

皇帝會羣臣

羣臣上禮

皇后受羣臣賀

皇后會命婦

皇太子會羣臣

皇太子會宮臣

宮臣上禮

卜日

冊皇太子有司卜日如別儀

告園丘

告方澤

告太廟

右竝有司行事如常告之儀

臨軒冊命

前一日尙舍奉御設御幄座於太極殿北壁下南向
守宮設皇太子次於東朝堂之北西向設羣官次於
東西朝堂太樂令展宮懸於殿庭又設舉麾位於上
下鼓吹令設十二案於建鼓之外乘黃令陳車輅尙
輦奉御陳輿輦竝如常儀典儀設皇太子版位於大

橫街之南道東北向又設羣官版位文官一品以下五品以上於懸東六品以下於橫街之南俱西向武官一品以下五品以上於懸西六品以下於橫街之

南當文官俱重行東向諸親於五品以上之南

皇宗親在

東異姓親在西

蕃客分方於六品以下之南皆以北爲上竝

如常儀

若有朝集使分方於文武官當品之下諸州使人分方於朝集使九品之後

設典

儀位於懸之東北贊者二人在南少退俱西向奉禮

設門外位皆如元日之儀其日皇太子相出前二刻

宮官應從者俱服其服訖衛率各勒所部陳設如常

左庶子版奏請中嚴諸侍衛之官各服其器服詣閣

奉迎僕進金輅於閤外南向左內率一人執刀立於輅前北向贊善一人在侍臣之前贊者二人又在贊善之前左庶子版奏外辦僕奮衣而升正立執轡皇太子具服遠遊冠若未冠則雙童髻絳紗袍升輿以出左右侍衛如常左內率前執轡皇太子升輅僕立授綬左庶子以下夾侍如式贊善進當輅前跪奏稱贊善臣某言請發引俛伏興退復位凡贊善奏請皆進當輅前跪奏稱具官臣某言訖俛伏興輅動贊善與贊者夾引以出左內率夾輅而趨至侍臣上馬所贊善奏稱請輅權停令侍臣上馬左庶子前承令退稱令曰諾贊善退稱侍臣上馬贊者

承傳文武侍臣皆上馬左庶子以下夾侍於輅前贊者在供奉官人內侍臣上馬畢贊善奏稱請令車右升左庶子前承令退稱令曰諾贊善退復位左內率升訖贊善奏稱請發引退復位皇太子輅動三師乘車訓導三少乘車訓從鳴鐃而行文武宮臣皆乘車以從至下車所鐃吹止至次前迴輅西向內率降立於輅右左庶子進當輅前跪奏稱左庶子臣某言請降輅俛伏興還侍位皇太子降輅舍人引皇太子就便座侍衛如常儀其日依時刻諸衛勒所部列黃麾大仗屯門及陳殿庭如常儀羣官諸親客使等依時

刻俱集朝堂次各服其服侍中版奏請中嚴鉞戟近
仗入陳於殿庭太樂令帥工人入就位協律郎入就
舉麾位諸侍衛之官各服其器服符寶郎奉寶俱詣
閣奉迎通事舍人引羣官客使就朝堂前位典儀帥
贊者先入就位舍人各引羣官客使次入就位皇太
子出次舍人引皇太子三師三少導從如式入立於
殿外之東西面諸衛率左右舍人及近侍量人從入黃門侍郎以冊及
寶綬各置於案上皆令史二人絳公服對舉案立於
門內道北西面冊案在北中書侍郎立於案後侍中
版奏外辦皇帝服袞冕之服御輿以出曲直華蓋警

蹕侍衛如常皇帝將出仗動太樂令令撞黃鍾之鐘
右五鐘皆應協律郎跪俛伏舉麾鼓祝奏太和之樂

鼓吹振作皇帝出自西房卽御座南向坐符寶郎奉

寶置於御座如常協律郎偃麾戛鼓樂止

凡樂皆協律郎舉麾

工鼓祝而後作偃麾戛鼓而後止

舍人引皇太子入就位

三師三少以下從入

者立於皇太子東南西面北上

皇太子初入門舒和之樂作至位樂

止典儀曰再拜贊者承傳皇太子再拜典儀曰再拜

羣官在位者皆再拜中書令降立於皇太子東北西

面中書侍郎一人引冊案又中書侍郎一人引璽綬

案進立於中書令之南少退俱西向中書侍郎取冊

進授中書令退復位中書令稱有制皇太子再拜讀冊訖皇太子再拜進受冊退授左庶子中書侍郎取璽綬進授中書令皇太子又進受璽綬退授左庶子中書令以下還侍位持案者以案退典儀曰再拜皇太子再拜典儀又曰再拜羣官在位者皆再拜舍人引皇太子出初行樂作出門樂止侍中前跪奏稱侍中臣某言禮畢俛伏興還侍位皇帝興太樂令令撞蕤賓之鐘左五鐘皆應鼓祝奏太和之樂鼓吹振作皇帝降座御輿入自東房侍衛警蹕如常儀侍臣從至閣樂止通事舍人引羣官在位者以次出

蕃客先出

謁中宮

前一日所司設皇太子次於永安門外之西東向周以行帷鋪座如式又設三師三少等便座於西南東面北上其日諸衛各勒所部屯門列仗及陳布於皇后正殿南門之外皇太子將至尙儀版奏請中嚴皇太子受冊訖舍人引皇太子三師三少導從及餘侍衛皆如常儀詣皇后所御之殿閣外道東西面立六尙以下各服其服俱詣皇后內閣奉迎尙儀版奏外辦皇后首飾褱衣御輿以出卽御座南向坐侍衛如式內謁者監引皇太子至肅章門

其侍衛之官並立於肅章門之外

司賓承引皇太子入立於庭北面立定皇太子再拜
訖司賓引皇太子至閤內謁者監承引以出舍人引
之次侍衛如式三師三少以下各之次

謁太廟

前一日右校埽除廟之內外守宮設皇太子次於廟
西南東向又設三師以下及文武侍臣次於皇太子
次之後少近西俱東向奉禮設皇太子版位於廟庭
道東北向其日皇太子入受冊所司轉鹵簿仗衛於
永安門西以俟皇太子朝皇后出訖舍人引之次侍
衛如常僕進金輅於次前左庶子版奏外辦皇太子

出次乘輅奏請發引及侍臣陪從鐃吹聲作皆如初
儀至安上門街當廟西鐃吹止至次前迴輅東向內
率降立於輅右左庶子進當輅前跪稱左庶子臣某
言請降輅俛伏興還侍位皇太子降輅乘輿入次侍
衛如常儀皇太子入次一刻頃率更令立於次門之
外左庶子版奏外辦皇太子出次侍衛如常率更令
引皇太子入自南門三師三少導從如式庶子二人
一人贊左一人贊右舍人二人從近仗量人從入皇
太子至位立定率更令奏請殿下再拜皇太子再拜
少刻率更令奏殿下辭皇太子再拜辭率更令前奏

禮畢率更令引皇太子出自南門入便次侍衛如常
皇太子既入便次有司轉仗衛於還塗如來儀僕進
金輅於次前如常庶子版奏外辦皇太子乘輿出次
升輅侍衛如常侍臣上馬陪從皆如來儀輅動過廟
鳴鑣而行至重明門宮官文武俱下馬皇太子乘輅
入三師三少還皇太子至東閣前迴輅南向左庶子
跪奏請降輅俛伏興皇太子降輅乘輿以入侍臣從
至閣左庶子版奏請將士各還本所

皇帝會羣臣

右皆如元會之儀其上壽辭云具官臣某等稽首言

皇太子岐嶷夙著令月吉日光踐承華臣等不勝大
慶謹上千萬歲壽

羣臣上禮

前一日守宮量設次於東西朝堂如常其日應上禮
之官依時刻各集於次皆服朝服奉禮先設上禮之
官位於東朝堂之前近南文東武西重行北向相對
爲首又設中書舍人位於文官爲首者之北南向設
奉禮位於文官東北贊者二人在南差退俱西向謁
者各引上禮之官就位立定令史二人對舉表案禮
部郎中引中書舍人前取表授舍人訖引案退奉禮

唱再拜贊者承傳在位者皆再拜中書舍人奉表入
進謁者引在位者退

皇后受羣臣賀

右皆如元日奉賀之儀其賀辭云皇太子岐嶷夙著
令月吉日光踐承華臣等不勝大慶謹奉賀以聞內
給事宣令答云知

皇后會命婦

右皆如元日之儀其上壽辭云具位妾姓等言皇太
子岐嶷夙著令月吉日光踐承華妾等不勝大慶謹
上千萬歲壽

皇太子會羣臣

右皆如元會之儀其賀辭云伏惟殿下固天攸縱德業日新式光震宮普天同慶某等情百恆品不勝欣悅左庶子宣令答云某以不敏夙承禮訓祇奉朝命慚懼惟深

皇太子會宮臣

右皆如元會之儀其上壽辭云具官臣某等言伏惟殿下固天攸縱德業日新式光震宮普天抃躍臣等不勝大慶謹上千萬歲壽

宮臣上禮